

# 關愛的故事



## 關懷探訪建友誼

我叫祥仔，喺中四嗰年，我地幾個同學一齊參加咗「探訪離島長者計劃」做義工，就識咗住喺大澳嘅獨居長者福伯。

大澳有 3,200 個居民，大約有三分一係長者，獨居長者就有 600 人，而福伯就係其中一個。記得第一次探佢嗰陣，我地五、六個人一齊去，完全唔識點樣同佢溝通，「老鼠拉龜，無訂埋手」，好在有社工喺度，幫手打開話題。喺呢幾年，我每年都去幾次探佢，喺社工同社康護士嘅指導之下，我慢慢學識同佢溝通嘅技巧，又學識處理藥物同長者家居安全嘅知識。

80 歲嘅福伯因為糖尿病影響，加上患有白內障，有一隻眼已經睇唔到嘢。佢曾經中過風，體質好弱，太太過身十幾年，自己一個人生活。佢好建談、好樂觀，成日同我講當年喺大澳打魚嘅生活。佢鍾意拉住我隻手，傾好多日常瑣事，又鍾意問我嘅戀愛近況，又會講吓佢當年同太太嘅浪漫史，仲不時流露出對亡妻惦念之情。

自從我同福伯建立咗友誼之後，雖然探訪計劃完咗，我依然定期去大澳，仲不時帶埋其他朋友一齊去探望呢位好朋友。佢有時讚我「愈大愈靚仔」，我就會回敬佢一聲「靚仔福」。我地不單只無代溝，而且仲十分投契，直情兩爺孫咁。

就係呢次義工服務，促使我選讀社會工作副學士課程，希望將來我可以投身社工行業，幫助更多有需要嘅人。

(500 字)